

春秋平議

春秋亂賊考

元和朱芑甫先生博極羣書著述宏富已刊行者如說文通訓定聲儀禮注一隅夏小正補傳小爾雅約注皆有功經訓之書余官京師哲嗣仲武孝廉以先生未刊稿本春秋三書見示曰春秋平議曰春秋三家異文覈日春秋亂賊考余曩得江都焦氏廷琥所著三傳經文辨異考訂三家異同視先生之書爲詳余將刊入叢刻至春秋亂賊顧氏棟大事記發明其例先生此書義旨亦同惟平議一書能持左公穀之平正杜何范之失實讀春秋者不可少之書也刊畢以三書稿本歸之誌其緣起如此

光緒十六年歲次庚寅孟冬德化李盛鐸謹識

春秋平議

元和朱駿聲著

左公穀各有是非杜何范不無偏袒出奴入主吾誰適從作平議

達膏肓

隱元年鄭伯克段于鄢 左氏云稱鄭伯譏失教也按段叛人也母弟叛兄首見于春秋爲莊公計母愛則不可教于居京之前叔強則不能教于居京之後若弗予京重違母意予京而卽圖之不友尤甚雖曰鄭志固處無可奈何之勢也倘不書鄭伯書鄭師則段非外寇書鄭人則段非疏臣段不弟故不言弟段實

弟故言鄭伯耳

隱元年天王使宰咺來歸惠公仲子之赗。左氏云且子氏未薨故名按仲子桓公之母也隱公之母聲子早卒故仲子又繼之仲子亦卒于惠公薨之前後若二年之夫人子氏薨則隱之夫人亦宋女自桓以下始娶于齊也三年之君氏卒則鄭大夫尹氏也至穀梁以仲子爲惠公之母孝公之妾則惠公立于周平王三年至隱公元年歷四十七年而其母始薨當有八十餘矣異說無據

隱七年膝侯卒。左氏云不書名未同盟也按不赴則何以書不名則何以赴此類實闕文也膝至魯僖十

九年嬰齊之名始見於經宣公之論始見於傳距此已七十五年又閱二十六年而昭公又見於傳則此膝侯之後世次且闕何況于名舊史已闕何關于例左氏之著凡例多有牴牾未可盡信也

桓四年天王使宰渠伯糾來聘  左氏云父在故名按使臣未有攝父職以出者此宰爲冢宰乎小宰乎宰夫乎據公羊以爲下大夫則宰夫也王命父則子不當代王命子則父不能干父在故名者謂以父職係於子耶恐無此書法謂宰卽伯糾之職耶則渠不受譏蓋惟冢宰周公稱公召祭毛稱伯劉單尹稱子餘皆名矣

桓五年天王使仍叔之子來聘  左氏云弱也按二十  
日弱仍叔之子無官職於朝則王不能使有官職於  
朝不應不書其名此蓋士也之子二字疑孝字誤分  
又筆畫少訛耳石尙士也欲書於春秋故求歸賑可  
見使無不書名公穀以爲父老子代則故事所未聞  
桓六年實來  左氏云不復其國也公穀作寔亦訓是  
若不復其國曰寔來寔來則復其國者曰虛來非來  
乎按寶州公名

桓十年來戰于郎  左氏云我有辭也按以周班後鄭  
不當怒卽怒亦小怨何至四年後莊公代子興師以  
報蓋齊以紀故讎魯故先書齊侯主師者齊也非鄭

也

桓十三年公會紀侯鄭伯己巳及齊侯宋公衛侯燕人戰齊師宋師衛師燕師敗績左氏以爲助鄭與宋戰蓋因十三年十二月之事而意度之此經會先書紀戰先書齊蓋齊攻紀而魯鄭救之也穀梁云其不地于紀也得之

桓十七年冬十月朔日有食之左氏云不書日官失之也按闕文也是月庚午朔據長曆推之

莊元年春王正月左氏云不稱卽位文姜出故也此傳害理公穀言不忍差允

莊元年夫人孫于齊左氏云不稱姜氏絕不爲親禮

也按夫人之與弑桓公此曖昧之事前年公喪至自齊夫人自當同至茲復孫去文姜出之說本不可通春秋據事直書善惡自見若絕不爲親則當不稱夫人不當不稱姜氏此不在筆削之例不然後年會禚會防會穀何反不絕耶且閔二年哀姜孫邾亦書夫人姜氏則此闕文無疑

莊十四年單伯會伐宋 左氏云齊請師于周按四十年中無請師于周之事是時周室衰微齊強圖霸決非情事所有前逆王姬亦以魯之單伯爲周之單子同一誤也

莊十八年公追戎于濟西 左氏云不言其來諱之也

按來則不知去乃追之則不言其來正所以不諱矣  
況魯旣無備戎何以卽去乎此亦舊史闕文  
莊十九年傳醫晳可謂愛君矣 按此非君子之言不  
可以訓

莊二十五年陳侯使女叔來聘 左氏云嘉之故不名  
按始結陳好是可嘉者陳侯也與使臣原仲不涉此

闕文

莊二十八年齊人伐衛 左氏云以其立子頽也按子  
頽之亂齊桓絕不置問經亦絕不一書至此時立頽  
之衛宣已死而遷怒於新喪之衛懿殊不可解必非  
事實公羊何注齊爲幽之盟不至故伐之較允

莊三十二年城小穀 左氏云爲管仲也按昭十一年傳曰齊桓城穀而置管仲焉此齊地之穀在今山東兗州府陽穀縣魯斷無爲齊臣城私邑之理卽曰感德大失國體此小穀自是魯地在今曲阜縣西北有故小穀城漢高以魯公禮葬項王於穀城是也本程氏迥說

閔元年齊仲孫來 左氏云嘉之也按公羊稱女子說以爲慶父此事之所必無者左氏之言可信但湫只是闕文不得與季子一例耳又按共仲自齊返魯當在季子來歸之前及成季歸而內不自安又謀篡弑成季不與仍奉僖公適邾故共仲復奔莒也

僖元年獲莒犁 左氏云嘉獲之也按嘉季友而所獲亦被嘉稱豈獲大夫尙不足嘉必獲卿乃嘉乎其實此類皆不在筆削之例

僖元年夫人氏之喪至自齊 左氏云君子以齊人之殺哀妻也爲已甚矣按淫亂殺子之婦人人得而誅之況齊以大義滅親乎

僖五年晉人執虞公 左氏云罪虞且言易也按經既不書滅虢則罪虞之意於何而見

僖二十三年杞子卒 左氏云書曰子杞吏也不書名未同盟也凡諸侯同盟死則赴以名禮也赴以名則亦書之不然則否按此類皆闕文赴不以名作何赴

法吾不解也

僖二十四年傳鄭子臧好聚鶡冠 左氏云君子曰服之不衷身之灾也按韓非子云知天文者冠鶡當是好聚左道之客恐其嫉言惑衆謀爲不軌故殺之若冠履之侈靡何至見殺

文七年宋人殺其大夫 左氏云不稱名衆也且言非其罪也按非其罪益當書名或書字脫無傳者後世既不知穆襄之族爲亂而無辜之公孫固公孫鄭亦泯沒無聞矣何貴於史要之皆闕文也

文八年公子遂會雒戎盟于暴 左氏云書曰公子遂珍之也按非公命而擅盟曷爲珍之別襄仲後爲弑

逆非可珍之臣乎此類實無關筆削

文八年宋人殺其大夫司馬宋司城來奔 左氏云司  
馬握節以死故書以官司城效節而出亦書以官皆  
貴之也脫無左傳所貴者不知何人何貴之有其實  
闕文

文十二年鄭伯來奔 左氏云太子以夫鍾與鄭子來  
奔公以諸侯逆之非禮也故書曰鄭伯來奔不書地  
尊諸侯也按公羊以盛伯爲失地之君自是所聞異  
辭而於書法尙近若太子朱孺旣未足爲君何得以  
諸侯禮逆之而竟稱鄭伯且以地與寶來而尊寵逾  
禮是獎叛人也何與書邾庶其莒牟夷邾黑肱大相

刺謬耶鄭伯下當有闕文

文十二年杞伯來朝二月庚子子叔姬卒 左氏云杞請絕叔姬而無絕婚叔姬卒不言杞絕也按成八年之叔姬卒於成五年爲杞所出別是一姬左氏誤合爲一杞伯朝與叔姬卒自是兩事又誤合爲一此與伯姬卒同例公穀允矣惟公女與公之姊妹皆得稱子或公女歟

文十四年齊人執單伯齊人執子叔姬 按單伯自是魯大夫明年書單伯至自齊左氏皆以爲周大夫非也

宣元年公子遂如齊逆女三月遂以夫人婦姜至自齊

左氏云稱族尊君命也舍族尊夫人也按此一事牽連書之立文自應如此豈有尊君尊夫人之別何關筆削且書族爲尊不書族又爲尊然則謂稱族尊夫人亦何不可而必以舍族爲尊乎成十四年叔孫僑如逆女同

宣三年晉趙盾弑其君夷皋 孔子曰越竟乃免此非夫子之言也按盾未出山而復卽使弑君之賊逆公子黑臀非知情而何

宣四年鄭公子歸生弑其君夷 左氏云權不足也按歸生日畜老猶憚殺之比君子畜其無君之心非一朝一夕之故矣豈權不足乎

宣五年公至自齊 左氏云書過也按此尋常記載所謂據事直書善惡自見者

宣九年陳殺其大夫洩治 孔子曰詩云民之多辟無自立辟其洩治之謂乎此非夫子之言也何以微人臣之唯阿立朝逢長君惡者乎

宣十年齊崔氏出奔衛 左氏云且告以族不以名按齊崔氏非一人矣使來告曰崔氏之守臣失守宗廟敢告則未知爲崔杼歟抑僖二十八年傳之崔夭歟且高國可稱守臣崔氏不得稱守臣考崔杼殺君距此五十餘年則此崔氏未必是杼也穀梁謂舉族而盡出之亦無是理

宣十八年歸父還自晉 左氏云善之也按在竟外復命雖不廢禮亦無所爲善

成十年傳葬晉景公魯人辱之故不書諱之也 按公如晉弔踰年至自晉自秋七月至春三月有九月之久受辱顯然而不以書葬爲諱乎此闕文也

襄十五年劉夏逆王后于齊 左氏云官師從單靖公逆王后于齊卿不行非禮也按不使卿而使大夫乃爲非禮斷無使卿而卿不行之事況上云從單靖公下云卿不行語亦自相觸背又按十四年傳劉定公賜齊侯命卽夏也錫命例使卿成八年召伯文元年毛伯皆是劉夏或劉子之誤歟公穀云過我殆亦魯

爲主婚

襄二十一年邾庶其以漆閭邱來奔 左氏云雖賤必書重地也按三叛人名正著其罪非重地之謂  
襄二十七年傳先書晉晉有信也 按楚實先晉而孔子私追正之則非信史矣孔子因書及諸侯之大夫盟于宋其書晉趙武楚屈建者夏之會非秋之盟也孔子原有微意而不如左所云

襄二十七年十有二月乙亥朔日有食之 左傳言十一月辰在申司歷過也按據長歷推之若十二月當爲辰在亥以申爲亥則三失間非再失也經文二爲誤字

襄二十八年傳癸巳天王崩

左氏云未來赴亦未書

禮也經書十有二月甲寅天王崩左傳云以徵過也

按癸已是十一月二十六日甲寅是十二月十七日

不知左氏據何國策書而知甲寅之誤據傳明年五月葬靈王則癸巳爲六箇月甲寅爲五箇月皆不及七月而葬

襄二十九年齊高止出奔北燕

左氏云罪高止也按

罪高止則當書齊放其大夫今以自出爲文未測聖意

襄三十年會于澶淵

左氏云不書魯大夫諱之也按

此亦闕文據傳各國皆無歸于宋所不必諱

襄三十一年莒人弑其君密州。左氏云書曰莒人弑其君買朱鉏言罪之在也。按子弑父而言父罪不可以訓。左氏所聞必有誤。弑實不因展輿也。唐趙匡欲改左傳以弑之以字爲之字亦求其說不得而爲之辭。果爾則其立文當云十一月國人攻莒子弑之。乃立展輿方順又杜預解買朱鉏爲密州之字不知買爲密之轉音。朱鉏爲州之合音非其字也。

昭十四年意如至自晉。左氏云尊晉罪已也。按此蒙前年執季孫意如之文無闕筆削。

攻墨守

桓六年子同生傳未稱子公羊子曰疑傳爲公羊高弟子所述師說也

隱元年春王正月。公羊云王者孰謂謂文王也。按文

王雖受命尙稟殷朔不得作此解當云周王耳春秋  
繁露孔子云文王似元年武王似春王周公似正月  
又云國人莫知按有文在乎宜通國所習知

隱元年公及邾婁儀父盟于昧 公羊云暨不得已也  
按暨之爲言泉也泉衆詞與也書讓于稷契泉皇陶  
亦不得已乎穀梁昭七傳亦曰不得已也以外及內  
曰暨皆所謂詞對公穀二傳專以助語之詞一挑半  
剔爲解經心法瑣屑可厭

又云漸進也按邾非夷何漸進之有

隱元年鄭伯克段于鄢 公羊云克之者何殺之也按  
段奔共奔齊又奔莒莊公自言寡人有弟不能和協

而使餬其口于四方則不殺可知

隱元年天王使宰咺來歸惠公仲子之賄 公羊云其言來何不及事也按及事便不書來則下經來求聘來求車來求金凡伯來聘南季來聘仍叔之子來聘又何以書豈非詞費

又云何以不言及仲子仲子微也按微者正宜書及不書恰似配匹之文況前云桓何以貴母貴也今日仲子微抑何矛盾

隱元年祭伯來 公羊云何以不稱使奔也按左氏云非王命似謂來聘穀梁云來朝而此獨云來奔未知所據劭公以伯爲字亦非

隱元年公子益師卒 公羊云何以不日遠也按二年  
公及戎盟于唐不亦遠乎左傳公不與小斂則公孫  
敖叔孫婼公孫嬰齊皆不與小斂乎穀梁曰惡也則  
公孫敖仲遂季孫意如不惡乎此闕文耳

隱二年無駭帥師入極 公羊云何以不氏貶按無駭  
卒後乃賜氏在八年左傳有明文是時不應稱氏又  
謂疾始滅經書入不書滅與穀梁同爲無稽也

隱二年紀履綸來逆女 公羊云譏始不親迎也按諸  
侯親迎于其所館豈有委宗廟社稷遠適他國之理  
隱二年紀子帛莒子盟于密 公羊云無聞焉爾按古  
人名字相應其名裂繻故字帛作履作伯者皆假借

字也穀梁二說尤非

隱四年衛州吁弑其君完 公羊云曷爲以國氏當國也按不當國便不書衛宜何書乎又曷以知何國之事乎或曰與宋督齊無知宋萬皆削其公族同然文公以後則又不然齊商人鄭歸生楚比皆書公子則此舊史闕文耳

隱四年翬帥師 公羊云曷爲貶與弑公也按後事不得先貶諸前事左爲允矣

隱七年滕侯卒 公羊云春秋貴賤不嫌同號美惡不嫌同詞然則何苦講書法唐盧仝春秋三傳束高閣獨抱遺經究終始將何以究之

隱十年宋人衛人入鄭宋人蔡人衛人伐戴鄭伯伐取之 公羊云因蔡宋衛之力也按宋衛方入鄭而又伐其與國鄭乃遷怒於已之附庸乎三國甘讓鄭取之乎左氏當矣

隱十一年公薨 公羊云隱何以無正月隱將讓乎桓故不有其正月也按史非隱作且元年何以有正月攝位之始不更重耶

桓七年穀伯綏來朝鄧侯吾離來朝 公羊云失地之君也按失國則不應書朝二君同失國同來朝乎桓十年齊侯衛侯鄭伯來戰于郎 公羊云內不言戰言戰乃敗矣按此以僖二十二年及邾人戰于升陘

例也然莊九年戰于乾時下云我師敗績桓十二年  
戰于宋左氏不言敗桓十三年及齊宋衛燕戰則四  
國敗績矣

桓十四年夏五鄭伯使其弟語來盟 公羊云夏五者  
何無聞焉爾按夏五之闕月字顯而易見孔子所以  
因而不改也當連下爲一節而公曰無聞穀曰傳疑  
不必

莊元年三月夫人孫于齊 公羊云念母也按前年公  
之喪至自齊夫人自當同來以慙魯戀齊又遁去耳  
若夫人本在齊史度公念母之意而特書之有是理  
乎況書亦何解於念母之痛且必係之三月乎

莊十三年公會齊侯盟于柯。公羊云劫桓公請汶陽之田。按涉夾谷之會而傳聞互異耳。此前齊無侵地之事。此後齊無歸田之文。韓非子呂氏春秋皆述公羊不足信也。

莊十八年公追戎于濟西。公羊云大其未至而豫禦之也。按未至而禦何得爲追。

莊二十年齊大災。公羊云大瘠也。以災爲痏大奇。

莊二十二年肆大眚。公羊云譏始忌眚也。按經云肆大眚而訓爲忌。大眚奇矣。何劭。公又謂子卯日更奇。

莊二十四年赤歸于曹。郭公。公羊云失地之君也。按果爾當書。郭公赤歸于曹矣。先儒以爲公者亡字之。

誤按郭氏之墟見于管子韓非等書則經之書與梁亡同存參

閔元年齊仲孫來 公羊云公子慶父也按書共仲而係之齊斷無此理又引子女子曰齊無仲孫竊疑仲孫湫爲高敬仲之後再按公羊所稱女子當是陳女叔原仲晉女叔侯或秦不更女父之裔

僖元年春王正月 公羊云其稱子何臣子一例也按自稱自解不若刪句中子字爲省事據此則公羊一書實爲弟子所述無疑此弟子解其師之言也

僖四年楚屈完來盟于師 公羊云尊屈完也按軍事之重豈有不以君命私自來盟之理此不書使而使

可知孔子尊夷狄之大夫何居

僖十七年滅項 公羊云爲桓公諱也按動輒爲齊桓諱而此節更奇使魯代齊受惡名孔子何意公穀不過謂承上伐英氏之文耳不足信也項去齊甚遠中隔宋魯二國

僖二十二年十有一月己巳朔 公羊云正也按實當朔則書之若不正豈欲孔子削此朔字耶

僖二十五年宋殺其大夫 公羊云宋三世無大夫三世內娶也與文七年同按內娶者亦大夫耳安得舉國皆無況經明書大夫也

僖二十八年晉人執衛侯歸之于京師 公羊云歸之

于者罪已定矣歸于者罪未定按之于與于有此大深意大分別可齒冷也公羊成十五年之曹伯何亦有之字耶

僖二十二年宋師敗績 公羊云雖文王之戰亦不過此也然則文王之戰無不敗者矣老子云以正治國以奇用兵韓非云戰陳之間不厭詐偽如宋襄之迂腐疏濶而求伯真不度德不量力也

僖二十八年衛元咺自晉復歸于衛 公羊云自者何有力焉者也此正如後世時文油腔滑調

文六年閏月 公羊云天無是月也按是年閏十二月戊子朔必有是月而後合天而反日天無是月淺陋

已極

文十四年宋子哀來奔 公羊云無聞焉爾若非左氏竟不知何許人

文十四年齊人執單伯齊人執子叔姬 公羊云單伯之罪淫乎子叔姬按兩言齊人經正嫌其相涉故兩書以別白之公穀乃使叔姬蒙不白之冤何哉

宣元年公卽位 公羊云此其言卽位何其意也按未免深文

宣元年遂以夫人婦姜至自齊 公羊云何以不稱姜氏譏喪娶也云內無貶于公之道按康誥云父子兄弟罪不相及奈何譏公而移其貶於夫人此朱子所

謂桑樹着刀穀樹出汁矣

成十六年楚子鄭師敗績 公羊云何以不言師敗績  
未焉爾按經無瘞字何以見重于師之敗績其實子  
者師之誤字也

襄二十三年邾婁鼻我來奔 公羊云以近書也按前  
之庶其以地書此鼻我又以近書然則小國大夫無  
不可書者矣

襄三十年葬蔡景公 公羊云君子辭也按若爲君子  
辭則中國無不可諱者矣

昭二十三年吳敗頓胡沈蔡陳許之師于雞父 公羊  
云中國亦新夷狄也然則昭公以後春秋可以不修

定六年季孫斯仲孫忌帥師圍運 公羊云曷爲謂之  
仲孫忌譏二名按是年夏及八年十年十二年何以  
不譏豈非詞費

哀五年閏月葬齊景公 公羊云喪以閏數也按是年  
閏十二月戊申朔然則喪景公者無大功以上者乎  
穀梁文六年傳喪事不數是矣

治廢疾

隱元年鄭伯克段于鄢 穀梁云緩追逸賊按緩追與  
否不可知然賊固逸矣未見其能殺也

隱元年歸惠公仲子之贈 穀梁云仲子惠公之母孝  
公之妻意謂與文九年僖公成風一例然終無據

隱三年二月己巳日有食之 穀梁云知其不可知知  
也 穀梁赤天學甚疎按據長曆己巳朔不誤蓋闕文  
也言食晦日亦非

隱七年滕侯卒 穀梁云滕侯無名按此滕宣公也無  
有謚無名之理舊史闕耳狄道無名亦無據長狄僑  
如無終子嘉父戎子駒支之類非名而何

隱七年戎伐凡伯于楚邱以歸 穀梁云戎者衛也貶  
而戎之按此無稽之言不過因楚邱衛地而爲此說  
果爾掩衛之罪而使戎代之有是斷獄之理乎

桓二年紀侯來朝 穀梁云惡桓也以月之爲惡桓匪  
夷所思

桓六年大閱 谷梁云蓋以觀婦人也按大閱以觀婦人甚奇殆因莊二十三年公如齊觀社有觀婦人之說而誤解于此墨子云燕有祖齊有社宋有桑林楚有雲夢此男女之所屬而觀也社蓋如鄭之溱洧上已男女所會合

桓六年子同生 谷梁云疑故志之時曰同乎人也按姜氏以三年九月至自齊六年以前無會齊襄事有何可疑夫子謹而書之正是特筆左傳桓公曰與吾同物命之曰同谷梁以同乎人爲說持論大繆

桓八年祭公來遂逆王后于紀 谷梁云不言使何也不正其以宗廟大事卽謀乎我也按莊十八年左氏

傳號晉鄭使原莊公迎王后于陳則同姓諸侯亦得  
關與婚事不獨天子嫁女爲之主也

桓九年紀季姜歸于京師 穀梁云爲之中者歸之也  
按婦人謂嫁曰歸王后故書之魯主其婚故書之歸  
字並無他義

莊八年鄭降于齊師 穀梁云不使齊師加威于鄭也  
按降非憚威則降者威乎

莊十年荆敗蔡師于莘 穀梁云何以謂之荆狄之也  
按荆楚同物楚本號荆魯僖公以後始書楚

莊十七年齊人執鄭詹 穀梁云鄭之佞人也按僖七年左傳鄭有叔詹堵叔師叔三良爲政詹非佞人殆

涉太子華而誤

莊二十六年曹殺其大夫 穀梁云無命大夫也爲曹  
羈崇也按二十四年戎侵曹曹羈出奔陳公羊謂三  
諫曹君不聽而去說苑卷九正諫篇有陳不用子家  
羈而楚并之之語羈殆字子家必非魯臣之子家羈  
可知曹羈在陳何至見殺或以二十四年之赤歸于  
曹赤卽羈耶考僖二十五年文七年宋殺其大夫皆  
不名宋亦無命大夫乎要之皆闕文也又按曹羈公  
羊韓非俱謂賢大夫賈逵謂曹君杜預謂世子據史  
記曹世家是時僖公名夷不名羈則賈說非也總緣  
左氏無傳遂多私說

僖三年公子友如齊莅盟 谷梁云莅者位也按莅字左氏作涖皆無從下筆此字正作竦从立从隶聲隶位聲近俗寫莅涖耳以此解經何啻夢囈

僖二十二年宋公及楚人戰于泓 谷梁云故曰禮人而不答則反其敬愛人而不親則反其仁治人而不治則反其知按此明用孟子語則谷梁亦非孔子弟子可知成十七年宮室不設八旬亦似本孟子又傳司馬子反曰自是子魚之誤子反楚司馬

僖二十五年宋殺其大夫 谷梁云以其在祖之位尊之也按春秋非夫子家乘惟不知闕文妄生臆說僖二十五年公會衛子晉慶盟于洮 谷梁云以公之

會目之也按以公而目之凡小國大夫皆可目矣與  
公羊襄二十三年傳邾畀我同爲曲說

文三年王子虎卒 穀梁云叔服也按王叔文公氏王  
叔名虎若叔服則周之內史非其人也

文六年閏月不告月 穀梁云天子不以告朔按此閏  
十二月戊午朔闕文也頒朔之禮周已漸廢

宣元年晉放其大夫胥甲父于衛 穀梁云稱國以放  
放無罪也按無罪不應稱國稱國有與衆棄之之意  
猶弑君稱國也此與九年陳殺其大夫洩冶同俱不  
在筆削之例

襄四年會吳于善稻 穀梁云吳謂善伊謂稻緩按皆

非雙聲不可通轉此方言之難解者與狄謂賁泉失台同然余吳人也今不聞其語

襄六年莒人滅鄫 穀梁云非滅也立異姓以莅祭祀滅亡之道也按趙匡曰鄫雖小國亦有君臣社稷豈可取異姓爲後案其情事莒滅鄫以鄫之外甥爲莒君之子者守之以爲附庸耳後魯取鄫則取莒之附庸也其說明通

定二年雉門及兩觀灾 穀梁云不以尊者親灾也按使雉門先灾然後及兩觀亦不以尊者親灾乎門觀亦有尊卑瑣屑可笑

定十四年天王使石尙來歸脤 穀梁云石尙欲書春

秋按國史列邦皆有之不甚足重若魯之春秋孔子此時尙未修也

公穀二家專以經中助語之詞釋經之意是爲詞費孔子一字之褒貶果在是乎

春秋平議終

春秋亂誠考

聚學軒叢書第五集

元和朱駿聲箸

貴池劉世珩校刊

春秋說題辭云春秋一萬八千字李燾曰今闕一千二百四十八字然則春秋既修之後一千八百餘條中傳寫殘闕亦復不少後儒乃欲于日月名字爵號氏族一二字異同爲褒貶何也按如晉弑其君州蒲闕欒書字黑肱以濫來奔闕邾字原無疑義必曲爲立說反誣聖經矣惟臣出君概以君自出爲文者君之國君實有之不予以臣爲主之意且魯昭時事固不能無所忌諱也故襄二十年左傳衛寧惠子謂其子悼子曰吾得罪于君名藏在諸侯之策曰孫林父甯

殖出其君而十四年經但書衛侯出奔齊此改舊史以就夫子之新義者至襄七年鄭髡頑之不書弑以瘡疾赴故昭元年楚糜之不書弑以本有疾故哀十年齊陽生之不書弑以赴于師故事非顯然嵒著聖人亦不以傳聞爲鐵案也若魯之內諱則又臣子之義不在此例杜預乃謂諸侯自取奔亡之禍所以責其君顧棟高本之謂臣弑君子弑父非一朝一夕之故聖人作春秋所以戒人君知其漸而豫爲之防是孔子成春秋而暴君頑父懼非亂臣賊子懼也夫豈其然作亂賊考按莊公二十四年曹羈出奔陳羈者曹僖公大夫也韓非子難言篇與比干剖心傳說轉鬻夷吾求縛同論公羊傳謂三諫曹君不聽而去蓋賢臣賈逵以爲曹君非也又按襄公

二十九年閹弑吳子餘祭此越俘之忠於越者既爲閹不得不書弑而不當在亂賊之例也

隱元年鄭伯克段于鄢 母弟謀逆亂賊首見於春秋隱四年春衛州吁弑其君完九月衛人殺州吁于濮

庶兄篡國

隱十一年冬十有一月壬辰公薨 臣公子翬弑君弟桓公弑兄也凡內弑不書諱也

桓二年正月宋督弑其君與夷及其大夫孔父三月公會齊侯陳侯鄭伯于稷以成宋亂四月取郜大鼎于宋 臣弑君

左傳隱五年曲沃莊伯伐翼逐翼侯王命立翼侯子哀侯

桓三年曲沃武公伐翼弑哀侯七年誘哀侯子小子

侯殺之八年滅翼王命立哀侯弟繢于晉莊十六年武公兼并晉國王命以一軍爲晉侯十八年晉侯朝王公族篡逆而經不書

左傳桓五年陳佗殺太子免而代之庶叔父篡逆按經書春正月甲戌己丑陳侯鮑卒甲戌下己丑上必有五父謀逆之事而舊史文闕耳三傳之說皆未盡然明年經書蔡人殺陳佗可見也

左傳桓十年虞叔伐虞公虞公出奔共池母弟逐君而經不書

桓十一年九月宋人執鄭祭仲突歸于鄭鄭忽出奔衛庶弟篡國

桓十五年五月鄭伯突出奔蔡鄭世子忽復歸于鄭九月鄭伯突入于櫟臣祭仲出君迎君

桓十六年十一月衛侯朔出奔齊初母宣姜殺長子急子而立其子朔今庶兄公子洩公子職逐君立君左傳桓十七年鄭高渠彌弑昭公而立公子亹十八年齊殺子亹祭仲逆子儀立之臣弑君而經不書

桓十八年正月公會齊侯于灤公與夫人姜氏遂如齊四月公薨于齊夫人殺夫

桓十八年周公欲弑莊王而立王子克辛伯告王遂殺周公黑肩王子克奔燕王臣謀逆未成

莊八年十一月齊無知弑其君諸兒從弟弑兄

莊九年夏公伐齊納子糾齊小白入于齊八月及齊師戰于乾時我師敗績九月齊人取子糾殺之弟殺兄自立

莊十二年八月宋萬弑其君捷及其大夫仇牧臣弑君

左傳莊十四年鄭傅瑕殺鄭子及其二子納厲公臣弑

君而庶兄篡弟復國經不書

左傳莊十九年周薦國邊伯石速詹父子禽祝跪奉子頽

以伐王二十一年鄭師虢殺王子頽庶叔父謀逆而經不書

莊三十二年子般卒公子慶父如齊叔父弑從子

閔二年公薨九月夫人姜氏孫于莒公子慶父出奔莒  
叔父弑從子

僖五年晉侯殺其世子申生 妾母驪姬殺太子

僖九年晉里克殺其君之子奚齊 臣弑君

僖十年晉里克弑其君卓及其大夫荀息 臣弑君

僖二十四年天王出居于鄭 母弟王子帶謀逆

僖二十八年衛侯出奔楚六月衛侯鄭自楚復歸于衛

冬晉人執衛侯歸之于京師 臣出君訟君

僖三十年秋衛侯鄭歸于衛 臣周顥冶厔弑其君公

子瑕

文元年楚世子商臣弑其君頽 子弑父

文七年宋人殺其大夫司馬宋司城來奔 宋襄夫人  
因戴氏之族華氏樂氏皇氏殺其孫孔叔公孫鍾離  
及大司馬公子卬而司城蕩意諸來奔

文十年楚殺其大夫宜申 臣鬪子西與仲歸謀逆  
文十二年鄭伯來奔 鄭伯卒鄭人立君太子朱孺以  
夫鍾與鄭邦來奔蓋叛人也經鄭伯下當有鬪文按  
公羊氏則以盛伯爲失地之君

文十四年齊公子商人弑其君舍 叔父弑從子

文十六年宋人弑其君杵臼 祖母襄夫人殺其孫昭  
公而立庶孫公子鮑此經書宋人變文也不得書祖  
母

文十八年齊人弑其君商人近臣邴歟闔職弑君此經書齊人變文也賤臣私怨不書姓名

文十八年冬十月子卒叔祖公子遂及妾母敬嬴殺太子惡及視也按子下闕惡字公羊傳謂子赤則闕赤字

文十八年莒弑其君庶其子僕弑父莒下闕世子僕

三字

宣二年晉趙盾弑其君夷皋臣弑君

宣四年鄭公子歸生弑其君夷臣公子宋與公子歸生弑君

左傳宣四年楚鬪椒攻王

臣謀逆而經不書

宣十年陳夏徵舒弑其君平國

臣弑君

左傳宣十五年潞酆舒殺君夫人又傷其君之目相臣

肆虐遂陷君于國滅赤狄小國故經不書

左傳成十三年曹公子負芻殺太子自立庶子弑適子

經不書

成十八年晉弑其君州蒲臣樂書中行偃弑君晉下  
闕樂書字穀梁以稱國爲君惡甚矣非也

成十八年宋魚石復入于彭城臣魚石向爲人鱗朱  
向帶魚府據邑以叛鄭楚助之

襄七年鄭伯髡頑如會未見諸侯卒于鄆臣公子駢  
弑君而以瘡疾赴于諸侯

襄十四年衛侯出奔齊 臣孫林父甯殖出其君

襄二十一年邾庶其以漆閭邱來奔 叛臣

襄二十三年陳殺其大夫慶虎及慶寅 叛臣

襄二十三年夏晉樂盈復入于晉入于曲沃冬晉人殺

樂盈

叛臣

襄二十五年齊崔杼弑其君光 臣弑君

襄二十六年衛甯喜弑其君剽衛侯衎復歸于衛 臣

弑君及世子

襄二十六年衛孫林父入于戚以叛 叛臣

左傳襄二十六年宋向戌與夫人及寺人伊戾殺太子痤

臣助妾母殺太子

襄三十年蔡世子般弑其君固 子弑父

襄三十年鄭良霄出奔許自許入于鄭鄭人殺良霄

叛臣

襄三十一年莒人弑其君密州昭元年莒去疾自齊入于莒莒展輿出奔吳 煦世子展輿弑父自立世子去疾逐君也莒人當書莒公子展輿莒去疾當書莒世子去疾莒展輿當書莒子展輿

昭元年楚子麇卒楚公子比出奔晉 季父公子圍弑從子自立按麇本有疾問疾而陰弑之當是以疾赴諸侯

昭三年北燕伯款出奔齊 臣殺君之外嬖君懼出奔

昭四年叔孫豹卒陪臣豎牛殺主及其長子孟丙逐次子仲壬

昭五年莒牟夷以牟婁及防茲來奔叛臣

昭八年陳侯之弟招殺陳世子偃師從父公子招公子過受妾母之屬殺太子而立庶子留致君自縊且國滅也

昭十年齊樂施來奔臣樂施高彊伐君

左傳昭十二年周原輿臣逐原伯紂而立公子跪尋陪臣逐主

昭十二年公子慤出奔齊陪臣南蒯與公子慤謀逐其主季氏蒯以費叛如齊子仲從之

昭十三年楚公子比自晉歸于楚弑其君虔于乾谿楚公子棄疾殺公子比 皆弟殺兄

昭十四年莒殺其公子意恢 臣蒲餘侯茲父與公子鐸殺意恢逐郊公逆君弟庚輿立之

昭十九年許世子止弑其君買 父疾子用藥不慎致死

左傳昭二十年楚太子建奔宋 臣費無極害太子

昭二十年宋華亥向盜華定出奔陳 臣劫君爲亂

昭二十年盜殺衛侯之兄紮 臣齊豹北宮喜褚師圃

公子朝作亂殺君兄而君出奔時母夫人宣姜通于

公子朝

昭二十一年宋華亥向盜華定自陳入于宋南里以叛  
臣華驅殺弟多寡召亡人亥定向盜以叛

昭二十一年蔡侯朱出奔楚 叔父東國謀篡

昭二十二年王室亂劉子單子以王猛居于皇秋劉子  
單子以王猛入于王城冬十月王子猛卒二十三年  
天王居于狄泉尹氏立王子朝二十六年天王入于  
成周尹氏召伯毛伯以王子朝奔楚 長庶子王子  
朝謀篡弟位

昭二十三年莒子庚輿來奔 臣烏存帥國人逐君迎  
立舊君郊公

昭二十五年公孫于齊次于陽州十有一月齊侯取鄆

二十六年公至自齊居于鄆二十七年春公如齊公至自齊居于鄆冬公如齊公至自齊居于鄆二十八年公如晉次于乾侯二十九年春公至自乾侯居于鄆公如晉次于乾侯冬十月鄆潰三十年公在乾侯三十一年公在乾侯季孫意如會晉荀躤于適厯晉侯使荀躤唁公于乾侯三十二年公在乾侯取闢十二月公薨于乾侯 臣季孫孟孫叔孫伐公公出奔不反

昭二十七年吳弑其君僚 從兄公子光弑弟自立

左傳昭二十九年周王子趙車入于鄆以叛 王子朝餘黨

經不書

昭三十一年黑肱以濫來奔 鄖臣叛君黑肱上闕邾  
字

定五年季孫意如卒 菩臣陽虎因其主桓子乃釋而  
盟之七年虎居鄆陽關以爲政

左傳定五年吳夫槩王自立與王鬪廬戰不勝奔楚爲堂  
谿氏 母弟謀逆

定六年周儋翩率王子朝之徒作亂七年天王處于  
姑蘘以避亂 王子朝餘黨經不書

定八年從祀先公盜竊寶玉大弓九年得寶玉大弓

陪臣陽虎欲以己更孟氏與季寤公鉏極公山不狃  
叔孫輒叔仲志作亂虎入于譙陽關以叛九年奔齊

又奔宋遂奔晉

定十年叔孫州仇仲孫何忌帥師圍郿陪臣侯犯以郿叛旣而奔齊

定十一年宋公之弟辰及仲佗石疆公子地自陳入于蕭以叛秋宋樂大心自曹入于蕭十四年宋公之弟辰自蕭來奔母弟叛兄

定十三年晉趙鞅入于晉陽以叛冬晉荀寅士吉射入于朝歌以叛晉趙鞅歸于晉陪臣趙稷涉賓以郿郿叛荀范助之伐趙氏遂伐公以叛

定十三年辟弑其君比不可考

定十四年衛世子蒯瞶出奔宋太子謀殺母南子不

克而奔

哀二年夏四月丙子衛侯元卒晉趙鞅帥師納衛世子  
刺晉于戚三年齊國夏衛石曼姑帥師圍戚五年晉  
趙鞅帥師伐衛七年晉魏曼多帥師侵衛十三年晉  
魏曼多帥師侵衛續經左氏十四年晉趙鞅帥師伐衛十  
五年晉趙鞅帥師伐衛十六年衛世子蒯聵自戚入  
于衛衛侯輒來奔 父奪子國子拒父師

哀四年盜殺蔡侯申 臣公孫翩弑君此經書盜變文  
也蓋與諸大夫同謀有公孫姓公孫霍公孫辰非翩  
一人之事而手射君者左氏以爲翩耳

哀五年齊侯杵臼卒左傳立茶公子陽生六年齊陽生入于齊

齊陳乞弑其君荼 兄弑弟

左傳哀八年齊鮑牧謂羣公子使女有馬千乘乎公子懇之 臣謀亂未成

哀十年邾子益來奔左傳遂奔齊又二十二年邾隱公自齊奔越人歸之太子革奔越太子革逐父

哀十年齊侯陽生卒 臣弑君左傳齊人弑悼公蓋以疾赴于魯吳邾伐齊之師經據赴書

續左氏經哀十四年小邾射以句繹來奔叛臣

續左氏經哀十四年宋向魋入于曹以叛寵臣謀逆

續左氏經哀十四年夏四月齊陳恆執其君寘于舒州六月齊人弑其君壬于舒州臣弑君

諸侯無王啟亂賊之漸附考于後

左隱三年鄭祭足帥師取溫之麥秋又取成周之禾

傳隱五年曲沃叛王

隱七年戎伐凡伯于楚邱以歸

左隱十年蔡人衛人郕人不會王命

桓五年蔡人衛人陳人從王伐鄭左傳王卒大敗祝聃射

王中肩

左莊十六年薦國以晉師伐夷 諸侯助亂臣

傳莊十九年衛師燕師伐周 助王子頽爲亂

左僖十一年揚拒泉州伊雒之戎同伐京師入王城助

王子帶爲亂

僖二十八年天王狩于河陽左傳晉侯召王且使王狩

不修春秋當書晉侯召王王至于河陽故孔子曰以臣召君不可以訓而筆削之稱狩

左傳文十七年周甘歎敗戎于郊垂

左傳成元年王師敗績于茅戎 左傳晉侯使瑕嘉平戎于

王公羊穀梁董子春秋繁露則以爲敗于晉

左傳成十一年晉郤至與周爭鄆田王命劉康公單襄公

訟諸晉

左傳昭九年周甘人與晉閭嘉爭閭田晉梁丙張趯率陰

戎伐穎

春秋亂賊攷終